

Powšitkowne WOZJEWJENJA

njedźelu, 17. awgusta 2025

Zelowa njedźela a swójbny swjedzeń

Křesćansko-socialny kubłanski skutk z.t. přeprašuje zhromadnje z klóštrom Marijinej hwězdu na zelowu njedźelu do Zežiwjenskeho a zeloweho centruma w Pančicach-Kukowje, kotraž je tutu 17. awgusta. Zdobom je to lětsa klóšterski a swójbny swjedzeń. Swjedženske kemše w 10.30 hodź. budže Zhorjelski generalny wikar Markus Kurzweil swjećić. Zakónčacy ekumeniski nyšpor ze žohnowanjom zelow, kotryž swjeći mjez druhim fararka Jadwiga Malinkowa ze Slepoho, budže w 17.00 hodź.

Wustajeńca wo stawiznach nabožneho a narodneho lajskeho dźiwadła wosady

„Serbske nabožne a narodne lajske dźiwadlo w Chróšćanskej wosadze wot lěta 1877“ rěka nowa wobrazowa wustajeńca, kotruž je sekcija wěda a skutk Towarstwa Cyrila a Metoda z.t. zestajiła. Wujimk z njeje – dźesać taflow – budže we wobłuku zeloweje njedźele Zežiwjenskeho a zeloweho centruma w Pančicach-Kukowje njedźelu, 17. awgusta, w tamnišej lodowej pincy přistupny. Cyłkownu přehladku móža sej zajimcy kaž tež hosćo kongresa Europasion w septembrje w Chróšćicach wobhladać.

Počesća třoch Zejičanow

Zejičanska wjesna zhromadnosć, Maćica Serbska z.t. a Towarstwo Cyrila a Metoda z.t. přeprašuja wšitkich na poswjećenje pomnika za prelata a čestneho kanonika Jakuba Buka, kanonika Michała Buka a kanonika Jakuba Šubu. Wšitcy tři su rodźeni Zejičenjo. Chróšćanski farar Měrćin Deleněk poswjeći pomnik, kotryž změje swoje městno při wjesnym swjatym křižu, njedźelu, 24. awgusta, w 15.00 hodź. Farar Beno Jakubaš wosobiny předstaji. Cyrkwinski chór a dujerjo Chróšćanskeje wosady swjatočnosť wobrubja. Po njej su wšitcy na swačinu přeprašeni. Awta smědža na parkowanišću při křižowanišću wotstajić.

„Moja domizna we wobrazach“

Nowu wustajeńcu z mólbami Ludmiły Bizoldoweje z Budyšina pod titulom „Moja domizna we wobrazach“ wotewrje Budyska Serbska kulturna informacija (SKI) srjedu, 20. awgusta, w 17.00 hodź. w svojich rumnosćach w přizemju Serbskeho domu na Póstowym naměsće 2. Wšitcy su wutrobnje přeprašeni. Wustajeńca budže hač do kónca oktobra k wotewrjenskim časam SKI přistupna: wot póndzele hač do pjatka, wot 10.00 do 16.30 hodź., wutoru a štwórtk hač do 18.00 hodź., wot septembra jeniče štwórtk hač do 18.00 hodź.

Lětni koncert

Chór Meja přepraša wšitkich zajimcow na swój lětni koncert na zahrodze při Radworskej farskej cyrkwi, kotryž budže njedźelu, 31. awgusta, w 16.00 hodź. Program wuhotuje zhromadnje ze skupinu „Wólbernosće“. Wot 15.30 hodź. poskićuja swačinu.

Dekanatny dzeń w Różeńće

Wšitcy wěriwi su sobotu, 23. awgusta, na zhromadny dzeń Budyskeho dekanata pod heslom „Marija – znamjo nadźije“ do Róžanta přeprošeni. Liturgiske zahajenje budže w 15.00 hodź. z wustajenjom Najswjećišeho w putniskej cyrkwi. Hižo wot 14.00 hodź. poskićuja wosady kofej, jeli to same organizuja, dokelž so zahe na puć podadźa. Štóž chce, móže piknikować. Wot 16.00 do 18.00 hodź. změja zamołwići pisanu zabawu wokoło cyrkwy spřihotowany, mjez druhim wšelake hry, paslenje, hermark a džěćacy program. W cyrkwi móža wopytwarjo na hudźbu słuchać. Nimo toho budže tam přiležnosť, sakrament wujednanja w swjatej spowědži přijimać, abo spowědnu rozmołwu wjesć. Dekanatny dzeń skónči so z Božej mšu we 18.00 hodź. w Róžeńčanskej swjatnicy. Tón dzeń předwječorne kemše w serbskich wosadach njebudu.

Zetkanje samostejacych

Samostejacy ze serbskich wosadow su na dalše zetkanje wutoru, 2. septembra, w 14.00 hodź. do Smochčanskeho kubłanišća swjateho Bena přeprošeni. Zajimcy njech so hač do wutory, 26. awgusta, w redakciji Katolskeho Posoła přizjewja, telefonowe čisło (0 35 91) 55 02 12. Dalši zajimcy, kotřiž njejsu samostejacy, su tohorunja wutrobnje witani. Kóždy njech sej Wosadnik sobu přinjese. Štóž chce wotewzaty być, njech to prošu zdžěli.

Młodostni na dwudnjowsku kubłansku jězbu přeprošeni

Serbskich młodostnych přeprošuje Towarstwo Cyrila a Metoda z.t. (TCM) na jězbu do Dachauwa a Mnichowa. Při tym pónđe mjez druhim wo přesćěhanje Serbow za čas nacionalsocializma, wosebje na přikładze zbóžneho kapłana Alojsa Andrickeho. Bus wotjědže pjatk, 3. oktobra, w 6.00 hodź. Nawrót je za sobotu, 4. oktobra, wokoło 20.00 hodź. planowany. Předwidžane je přeni dzeń popołdnu wodženje po Dachauskim wopomnišću koncentraciskeho lěhwa, hdžež su wjacori serbscy duchowni zajeći byli. Na pózdnim popołdnu je w klóštrje karmelitkow na teritoriju wopomnišća Boža mša skazana. Nazajtra wopytaja wobdžělnicy jězby w Mnichowje pomnik za wopory nacionalsocializma. Wo dalšu wosebitostku so TCM hišće stara. Na zažnym popołdnu so na dompuć nastaja. Jězba z přenocowanjom a zastaranjom płaći 50,00 eurow. Přihotowane zetkanje budže sobotu, 27. septembra, w 14.00 hodź. w Radworju na farje. Na jězbu přeprošeni su wšitcy zajimowani młodostni, wosebje či, kotřiž budu lětsa do wosadneje młodžiny přiwzaći. Za to měli so woni online přizjewić. Link je pod www.posol.de wozjewjeny.

Relikwiar swjateje Terezy z Lisieuxa w Budyšinje

Składnostnje lětušeje 100. róčnicy swjatoprajenja swjateje Terezy z Lisieuxa (1873–1897) budže relikwiar, pućowacy po cyłej Němskej, z někotrymi jeje smjertnymi powostankami wot srjedy do pjatka, 17. do 19. septembra, w Drježdžansko-Mišnjanskim biskopstwje. Wšitcy wěriwi su přeprošeni relikwije česćować, na přikład sami čicho, abo so k modlenju a Božim službam zhromadzić. Přenja planowana stacija je Budyska cyrkej Našeje lubeje Knjenje, dalša budže cyrkej swjateho Antonija w Drježdžanach-Löbtauwje a jako poslednja wosada swjateje Terezy w Flöha. W Budyšinje budže srjedu, 17. septembra, we 18.00 hodź. mjez druhim nyšpor za wšitkich serbskich wěriwych z duchownymi impulsami a wujasnjenjemi. Nazajtra, štwórtk, 18. septembra, w 9.00 hodź. swjeća Božu mšu w cyrkwi Našeje lubeje Knjenje za wšěch wěriwych. Na česćowanje su wuraznje tež wěriwi z druhich wosadow přeprošeni.

Zastupne lisćiki za pasionske předstajenje online kupić

Za inscenaciju pasionskeje hry „Sćěhuj mje!“ lětsa w septembru w Chrósćicach móža sej zajimcy zastupne lisćiki online kupić. W padže, zo by zarjadowar jednotliwe předstajenje wotprajić dyrbał, wón pjenjezy kupcam wróci. Link na přistup je pod www.posol.de a tam pod wotkazom na pasionsku hru wozjewjeny. Tam su tež plaćizny podate. Na plakatach a flajerach nańdu zajimcy QR-code na wotpowědnu stronu. Tež při kasy móža sej zajimcy lisćik kupić. Towarstwo Cyrila a Metoda z.t. (TCM) předstaji pasionsku hru zhromadnje z Chróšćanskej wosadu pjatk a sobotu, 5. a 6. septembra, w 19.30 hodź., njedźelu, 7. septembra, w 16.00 hodź., kaž tež sobotu a njedźelu, 13. a 14. septembra, w 19.30 hodź. w Chrósćicach na farskej łuce.

Žarowanski kruh Carity – jedyn za dźěći, druhi za dorosćenych

Hospicna služba Hornjołužiskeho zwjazka Carity z.t. přeproša na žarowanskej kruhaj, kotrež zahajitej so štwórtk, 18. septembra. Jedyn je za dźěći, druhi paralelnje za dorosćenych mysleny. Wobaj trajetej stajnje wot 16.00 do 18.00 hodź. Přenje zetkanje budže w rumnosćach zwjazka Carity w Kamjencu na Zapadnej 22. Zajimcy měli so za kurs, kotryž přewjedže so z džesać zetkanjemi něhdže do srjědź lěta 2026, do toho telefonisce pod čisłom (0 35 78) 37 43 12 abo z mailku pod adresu Hospiz@Caritas-Oberlausitz.de přizjewić.

Dźěłarnička ikonografije „wobraz a słowo“ za młodostnych

Młodostni, maće lóšt na workshop, wulět a wuměnu z pólskimi młodostnymi? To wšitko móžeće wot pjatka do soboty, 19. do 20. septembra, w „Domje Gerharta Hauptmanna“ w Jelenjej Górje dožiwić. Čehodla dźěłarnička ikonografije? Pisanje ikonow słuša k rědkim wumělstwam. Ikona je uniwersum, wobstejacy z mnohich tradicijow a technikow, kotrež buchu wot generacije ke generaciji na wšelakich městnach a we wšelakich nabožinach dale dawane a hač do džensnišeho posrědkowane. Tuž budźće wotewrjeni a wćipni za nowe impulsy a kulturnu wuměnu mjez młodostnymi. Při přizjewjenju pod sekretariat@sorbisches-museum.de maće mjeno, adresu, starobu a swoje telefonowe čisło podať. Interreg Pólska-Sakska a Euroregion Nysa projekt spěchujetej. Tohodla směće so jako młodostni darmotnje wobdźělić. Wjace informacijow nańdžeće na stronje Serbskeho muzeja www.sorbisches-museum.de.

M. Ošikowa